

## La Lettre Jèrriaise lé trais du mais d'Juilet 2021

Bouônjour bouonnes gens, ch'est Charlot L'Maistre aue la lettre Jèrriaise aniet lé trais du mais d'Juilet.

J'espéthe qué tout l'monde sont mangnifique maûgre lé mauvais temps ch't Été. Certainement, j'voudrais vaie lé solé pour pus d'un jour, mé ! Quand même qu'lé temps n'a pon té bein, dreinment i'y a ieu un tas d' chôses survénant aue l'Ensîgn'nie du Jèrriais tchi sont hardi excitant et j'voudrais pâsser les préchaines deux- trais minnutes pour vos en pâler. Pour la preunmié fais j'avons ieu l'opportunité d'ensîgni lé Jèrriais dans lé tchuthitchulum dans quat' écoles primaites— Ste Mathie, Lé Pliat Doue, St Martîn et Lé Bel Rouoya. J'avons prépathé des cours dé dgiêx leçons et tch'est app'lé 'Alentou D'Jèrri'. L'întention des cours est d'ensîgni lé Jèrriais à côté d'l'histouaithe dé Jèrri, les traditions et les couôteunmes, et étout deux- trais des histouaites d'ichîn. J'chouaisînmes chîn dates tchi 'taient hardi împortantes dans l'histouaithe dé Jèrri et pis j'prépathînmes deux leçons pour châque date. – ch'est trais à quatre heuthes à apprendre pour châque date! Les mousses ont té a apprendre entour lé Néolitique et comment qué Jèrri d'vînt eune île. Étout, entour lé dêveloppement du Jèrriais du Latîn, les pâraisses, l'înflience d'la tchultchuthe Nouormande et la pêqu'sie d'la mouothue au Gaspé. Les mousses ont apprîns comment dithe

‘Comment qu’ tu es?’ et les réponses, les noms et mênoms des pârraises en Jèrriais, les neunméthos en Jèrriais et un tas d’ aut’ choses. Vraiment, ch’a ‘tait mangnifique d’vaie tous les mouses excités entour Jèrri et lé Jèrriais et châque fais qu’j’vîsite ieune des écoles l’ y’a ieu un tas des mouses tchi sont hardi heutheux dé nous vaie et tchi sont enthousiaste à pratichi lus Jèrriais. Comme partie des cours j’avons fait un viage au Vièr Châté auve les clâsses et même les ouvriers du Châté dîtent qué ch’est mangnifique d’aver les mouses hors d’la salle acouo eune fais auprès les restrictions împosées par le pandèmi et l’s écoles veulent nos r’vaient l’année tchi veint et étout nous nouvelles maitrêsses, Susan et Merry, l’ s’ en vont c’menchi à ensîngni les mêmes cours dans quatre nouvelles écoles en Séptembre! Don, ch’na veurt dithe pus d’deux chents mouses éthont ‘tait ensîngni du Jèrriais duthant raïque siêx mais! Ch’est mangnifique, n’est che pon!

Chein qui m’a rêjouis pus ‘tait la raconnt’tie dé deux- trais des histouaithe traditionnel dé Jèrri ès mouses. J’ lus raccontis l’histouaithe du Seigneur dé la Hamb’ye et lé dragon et étout, la légende dé Saint Hélyi, înclyu eune modèle d’la tête dé Saint Hélyi tchi fut copée horte par les Vikings – la sienne qué les mouses aimaient hardi bein! Étout, j’portis un chapé spécial d’ raconnt’tie et eune rouoge câsaque à coue d’héthonde pouor raconter l’s histouaithe. Tchi fanne!

Et sus chutte note hardi heutheuse j'm'en vais vouos laissi. À la  
prèchaine mes bouons gens et ayiz un bouon Êté. À bétôt.